



Հավելված 1

Արդարադատության ակադեմիայի
կառավարման խորհրդի 27.04.2023 թվականի
ԿԽ-006/23 որոշման

ՈՒՍՈՒՑՄԱՆ ԾՐԱԳԻՐ

ԱՊՕՐԻՆԻ ԾԱԳՈՒՄ ՈՒՆԵՑՈՂ ԳՈՒՅՔԻ ԲՈՒՆԱԳԱՆՁՄԱՆՆ ՈՒՂՂՎԱԾ ԳՈՐԾԱՌՈՒՅԹՆԵՐ ԻՐԱԿԱՆԱՑՆՈՂ ԴԱՏԱԽԱՋՆԵՐԻ ԹԵԿՆԱԾՈՒԹՅՈՒՆՆԵՐԻ 2023 ԹՎԱԿԱՆԻ ՑՈՒՑԱԿՈՒՄ ԸՆԴԳՐԿՎԱԾ ԱՆՁԱՆՑ ՄԱՍՆԱԳԻՏԱԿԱՆ ՊԱՏՐԱՍՏՄԱՆ

1. ԸՆԴՀԱՆՈՒՐ ԴՐՈՒՅԹՆԵՐ

1. Ուսուցման սույն ծրագիրը (այսուհետ՝ Ծրագիր) ներառում է «Դատախազության մասին» ՀՀ օրենքի 38.1-րդ հոդվածով սահմանված կարգով ապօրինի ծագում ունեցող գույքի բռնագանձմանն ուղղված գործառույթներ իրականացնող դատախազների թեկնածությունների 2023 թվականի ցուցակում ընդգրկված անձանց (այսուհետ՝ Ունկնդիրներ) կրթական չափորոշիչները, ուսուցման ձևը, ուսումնառության ժամաքանակը և ժամկետները, ինչպես նաև դասավանդվող առարկայական կուրսերի համառոտ նկարագրերը:
2. Ծրագիրը մշակվել է Արդարադատության ակադեմիայի (այսուհետ՝ Ակադեմիա) կողմից՝ «Արդարադատության ակադեմիայի մասին» ՀՀ օրենքի (այսուհետ՝ Օրենք) 19-րդ հոդվածի պահանջներին համապատասխան:
3. Ծրագիրը նպատակաուղղված է Ունկնդիրների՝ ապօրինի ծագում ունեցող գույքի բռնագանձման հարցերով զբաղվող դատախազի պաշտոնում գործելու համար անհրաժեշտ կարողությունների, հմտությունների ձևավորմանը, մասնագիտական գիտելիքների ծավալի ընդլայնմանը:
4. Մասնագիտական պատրաստման գործընթացը վերաբերում է քաղաքացիական իրավունքի և քաղաքացիական դատավարության տեսական և գործնական հարցերին, «Ապօրինի ծագում ունեցող գույքի բռնագանձման մասին» ՀՀ օրենքի կիրառման առանձնահատկություններին, ակտիվների վերականգնման միջազգային փորձին և այդ ոլորտում համագործակցությանը: Ուսուցման գործընթացը նպատակաուղղված է ապօրինի ծագում ունեցող գույքի վերաբերյալ ուսումնասիրություն սկսելու հիմքերի և կարգի, գաղտնի տեղեկությունների մշակման, ապօրինի ակտիվների սառեցման ընթացակարգի, ուսումնասիրության արդյունքների ամփոփման և եզրակացություն կազմելու, հաշտության համաձայնության, հաշվապահական հիմունքների, ինչպես նաև այս ոլորտում միջազգային իրավական ակտերի, միջազգային համագործակցության, ակտիվների վերականգնման միջազգային և ներպետական կառուցակարգերի, ակտիվների հետախուզման և ֆինանսական վերլուծությունների վերաբերյալ Ունկնդիրների գիտելիքների ընդլայնմանն ու գործնական հմտությունների ձևավորմանը:
5. Ծրագիրն իրականացվում է առկա ուսուցման ձևով՝ լսարանային ուսուցման և փորձաշրջանի եղանակներով:

6. Ուսուցումն իրականացվում է դասախոսությունների, սեմինար և գործնական պարապմունքների, ինչպես նաև Ունկնդիրների ինքնակրթությունը խրախուսող կրթական արդի եղանակների կիրառման միջոցով:
7. Փորձաշրջանը կազմակերպվում է անհատական ծրագրին համապատասխան, որում ընդգրկվում են փորձաշրջանի ընթացքում պարտադիր կատարման ենթակա առաջադրանքներ՝ ըստ Ծրագրով նախատեսված ուղղությունների: Փորձաշրջանի մեկ օրվա տևողությունը 10 ակադեմիական ժամ է: Փորձաշրջանի ընդհանուր ժամաքանակը սահմանվում է 40 ակադեմիական ժամ: Փորձաշրջանի ավարտին Ունկնդիրը գնահատվում է դրական կամ բացասական:
8. Ուսումնառության ընդհանուր ժամաքանակը Ունկնդիրների համար սահմանվում է 122 ակադեմիական ժամ:
9. Ուսումնառության տևողությունը սահմանվում է 4 (չորս) շաբաթ (2023 թվականի մայիսի 2-ից մայիսի 26-ը)՝ ներառյալ 4 (չորս) օր տևողությամբ փորձաշրջանը (2023 թվականի մայիսի 23-ից մայիսի 26-ը):

II. ՈՒՍՈՒՄՆԱՌՈՒԹՅԱՆ ԺԱՄԱՆԱԿԱՅԻՆ ԿԱՌՈՒՑՎԱԾՔ

Տեվողությունը	Դասընթացների ժամաքանակ	Քննաշրջանի ժամաքանակ	Փորձաշրջանի ժամաքանակ	Ընդհանուր ժամաքանակ
մայիսի 2-ից մայիսի 26-ը	3 շաբաթ 80 ժամ (դասընթաց) (մայիսի 2-ից մայիսի 19-ը)	2 ժամ (1 քննություն) մայիսի 22	4 օր 40 ժամ (փորձաշրջան) (մայիսի 23-ից մայիսի 26-ը)	122 ժամ
ԸՆԴՀԱՆՈՒՐ	80 ժամ	2 ժամ	40 ժամ	122 ժամ

III. ԴԱՍԱՎԱՆԴՎՈՂ ԱՌԱՐԿԱՅԱԿԱՆ ԿՈՒՐՍԵՐԻ (ԴԱՍԸՆԹԱՑՆԵՐԻ) ՑԱՆԿ

№	Դասիչ	Անվանում	Ժ/ք
1.	P-C-AC-001-23	Քաղաքացիական իրավունքի և քաղաքացիական դատավարության արդի հարցեր	40
2.	P-C-AC-002-23	«Ապօրինի ծագում ունեցող գույքի բռնագանձման մասին» օրենքի կիրառման առանձնահատկությունները, ակտիվների վերականգնման միջազգային փորձը և այդ ոլորտում համագործակցությունը	40

**IV. ԴԱՍԱՎԱՆԴՎՈՂ ԱՌԱՐԿԱՅԱԿԱՆ ԿՈՒՐՍԵՐԻ (ԴԱՍԸՆԹԱՑՆԵՐԻ)
ՀԱՄԱՌՈՏ ՆԿԱՐԱԳԻՐԸ**

1. P-C-AC-001-23 Քաղաքացիական իրավունքի և քաղաքացիական դատավարության արդի հարցեր

Դասընթացը պայմանավորված է օրենսդրական զարգացման արդյունքում քաղաքացիաիրավական ոլորտում ներդրված ինստիտուտների, փոփոխության ենթարկված դրույթների, դրանց կիրառման վերաբերյալ իրավաբանական գրականության մեջ առկա մոտեցումների, քաղաքացիական իրավունքի այլ նորմերի կիրառման առանձնահատկությունների, դրա արդյունքում բացահայտված խնդրահարույց և վիճելի հարցերի, ինչպես նաև քաղաքացիական դատավարության կատարելագործման ուղղությամբ իրականացված բարեփոխումների արդյունքում օրենսգրքում ներդրված ինստիտուտների, ապօրինի ծագում ունեցող գույքի բռնագանձման վարույթի ուսումնասիրության, ՄԻԵԴ, ՀՀ Սահմանադրական դատարանի, ՀՀ Վճռաբեկ դատարանի ակտերում արտահայտված իրավական դիրքորոշումների ներկայացման, դրանց վերաբերյալ ապօրինի ծագում ունեցող գույքի բռնագանձմանն ուղղված գործառույթներ իրականացնող դատախազների թեկնածությունների ցուցակում ընդգրկված անձանց տեսական ու գործնական գիտելիքների ու հմտությունների փոխանցման անհրաժեշտությամբ:

Դասընթացը ներառում է՝

- քաղաքացիական իրավունքի սուբյեկտները և օբյեկտները,
- սեփականության իրավունքը և այլ գույքային իրավունքները, մասնավորապես՝
 - սեփականության իրավունքի տեսակները, սեփականության իրավունքի ծագման, փոփոխման և դադարման առանձնահատկությունները,
 - գույքն ուրիշի ապօրինի տիրապետումից հետո պահանջելու և բարեխիղճ ձեռքբերողի իրավական կարգավիճակի առանձնահատկությունները,
 - ուրիշի գույքից սահմանափակ օգտվելու իրավունքները,
 - ապահովված իրավունքը և այլն.
- գործարքները, մասնավորապես՝
 - գործարքի տեսակները, քաղաքացիաիրավական գործարքների վավերության պայմանները,
- պայմանագրերը,
- պարտավորական իրավունքի արդի հարցերը, մասնավորապես՝
 - քաղաքացիաիրավական պատասխանատվության առանձնահատկությունները պարտավորական իրավունքի ինստիտուտում (տույժի և տոկոսների կիրառման կարգի առանձնահատկությունները),
 - վնաս պատճառելու և անհիմն հարստացման հետևանքով ծագած պարտավորությունները,
 - ոչ նյութական վնասի հատուցման կարգը և պայմանները
- միջազգային մասնավոր իրավունքի արդի հարցերը, մասնավորապես՝
 - կոլիզիոն նորմերի կիրառման առանձնահատկությունները,
 - սեփականության իրավունքի կոլիզիոն կարգավորումը,
 - պայմանագրային հարաբերությունների միջազգային մասնավոր-իրավական կարգավորման առանձնահատկությունները.
- արժեթղթերի իրավական կարգավորման առանձնահատկությունները,
- քաղաքացիական դատավարության սկզբունքները, փուլերը, կողմերը,
- հայցի հարուցումը, ապացույց պահանջելը, ապացույցի ապահովումը,
- քաղաքացիական գործը դատաքննության նախապատրաստելու արդի հարցերը,
- ապացուցումը,

- դատաքննության հիմնահարցերը,
- հայցի ապահովման, նախնական ապահովման կիրառման առանձնահատկությունները,
- օտարերկրյա դատական ակտերը ճանաչելու և կատարման թույլատրելու, ֆինանսական համակարգի հաշտարարի որոշումը չեղյալ ճանաչելու և ֆինանսական համակարգի հաշտարարի որոշման հարկադիր կատարման համար կատարողական թերթ տալու վերաբերյալ դիմումներով, ինչպես նաև արբիտրաժի վճիռը չեղյալ ճանաչելու, արբիտրաժի վճռի հարկադիր կատարման համար կատարողական թերթ տալու, օտարերկրյա արբիտրաժային վճիռների ճանաչման և հարկադիր կատարման, արբիտրաժին դատական աջակցություն ցուցաբերելու վերաբերյալ դիմումներով գործերի վարույթների առանձնահատկությունները,
- վճռաբեկ և վերաքննիչ դատարաններում վարույթների առանձնահատկությունները,
- օտարերկրյա անձանց մասնակցությամբ գործերի վարույթների առանձնահատկությունները,
- քաղաքացիական գործերով իրավական օգնության առանձնահատկությունները,
- դատավարության նորմերի կիրառման հետ կապված այլ հիմնահարցեր,
- դատավարական փաստաթղթերի կազմման հմտություններ:

Գնահատումն իրականացվում է բանավոր եղանակով՝ P-C-AC-002-23 դասընթացի հետ համատեղ:

2. P-C-AC-002-23. «Ապօրինի ծագում ունեցող գույքի բռնագանձման մասին» օրենքի կիրառման առանձնահատկությունները, ակտիվների վերականգնման միջազգային փորձը և այդ ոլորտում համագործակցությունը

Դասընթացը պայմանավորված է ապօրինի ծագում ունեցող գույքի վերաբերյալ ուսումնասիրություն սկսելու հիմքերի և կարգի, գաղտնի տեղեկությունների մշակման, ապօրինի ակտիվների սառեցման ընթացակարգի, ուսումնասիրության արդյունքների ամփոփման և եզրակացություն կազմելու, հաշտության համաձայնության, հաշվապահության հիմունքների, ապօրինի ծագում ունեցող գույքի բռնագանձման ոլորտում ակտիվների հետախուզման և ֆինանսական վերլուծությունների, ակտիվների վերականգնման միջազգային և ներպետական կառուցակարգերի, միջազգային համագործակցության վերաբերյալ գիտելիքներ հաղորդելու, ինչպես նաև դրանք գործնականում կիրառելու կարողությունների ձևավորման անհրաժեշտությամբ:

Դասընթացը ներառում է հետևյալ թեմաները՝

- ապօրինի ծագում ունեցող գույքի բռնագանձման վարույթի առանձնահատկությունները,
- գույքի հետախուզում և ֆինանսական վերլուծություններ,
- էլեկտրոնային բազաներից օգտվելու հմտություններ,
- վարույթային փաստաթղթեր կազմելու հմտություններ,
- ակտիվների վերականգնման առնչվող միջազգային իրավական փաստաթղթերը,
- ակտիվների վերականգնման ոլորտում միջազգային համագործակցության գործիքակազմը,
- ակտիվների վերականգնման ներպետական մոդելներն ու փորձը:

Գնահատումն իրականացվում է բանավոր եղանակով՝ P-C-AC-001-23 դասընթացի հետ համատեղ: